

# POLLY MORBID:

## The Adventures of Omi!



Döst ass d'Omi.

Den Dokter seet d'Omi  
wier polymorbid.

Polypardon  
wat?,  
freet  
d'Omi.

Hire beschte Frënd, den Här  
Schäfer, mengt Polly Morbid  
wier e gudden Numm fir an  
de 70er am CBGBs am Vir-  
programm vun de Ramones  
opzetrieden.



Oder fir eng Superheldin,  
seet d'Omi. Si wollt schonn  
ëmmer eng Superheldin sinn.  
Wann een esou al gött wéi  
d'Omi, dann ass ee souwisou  
eng Superheldin.

Den Dokter seet, mat  
Krankheete wier net ze  
spaassen. Krankheete  
wieren nämlech doudeesch,  
besonnesch, wann een  
dorunner kéint stierwen.

Der Omi hiert Blut  
ass gläichzäiteg ze  
deck an ze dënn,  
hiert Häerz schléit  
ze lues an ze fest,  
hir Aen gesinn ze  
scharf an ze  
verschwommen, hir  
Oueren héieren alles  
an näischt.




Mat  
KRANK-  
HEETEN  
ass net ze  
spaassen.



DAT ASS AWER NACH LAANG  
KEE GROND FIR  
ANZEHÄNKEN, seet d'Omi.

Hire Kierper erënnert sech einfach un all d'Krankheeten, déi si jee hat.  
Iwwerhaupt ass esou eng Omi voller Erënnerungen, esou voll, dass d'Erënnerunge  
guer net méi all an d'Omi erapassen.



Hire Kapp ass esou voller Erënnerungen, dass d'Hoer hir zu  
Bierg stinn; si lafen hir zur Nues eraus an ovalen  
duerchsichtige Drëpsen; si hänken hir moies fréi a  
kellogsaarwege Grimmelen un de Wimperen an d'Omi muss  
se mat Ö de Blöe ewechwäuschen, soss kann si vu lauter  
Erënnerungen d'Doudeannoncen am Wort net méi lesen.

Si brauch e ganzen Dag fir d'Doudeannoncen ze lesen, well si sech  
dobäi un all déi Deeg erënnert, un deenen si net gestuerwen ass.